



IROMAG

Odlazni studenti



by IROUNMO

U OVOM BROJU

LJETNA ŠKOLA "MOJOJ BIH – OPEN YOUR MIND" NA UNIVERZITETU "DŽEMAL BIJEDIĆ" U MOSTARU

PROMOCIJA STUDIJE "NEGIRANJE GENOCIDA U KOMPARATIVNOM PRAVU I SUDSKOJ PRAKSI"

AKCIJA DARIVANJA KRVI

KLINIKA IZBJEGLIČKOG PRAVA: SPOJ ZNANJA, SARADNJE I HUMANOSTI

DAN PUN ADRENALINA I TIMSKOG DUHA NA GORANCIMA

UNIVERZITET „DŽEMAL BIJEDIĆ“ RAZVIJA SARADNJU S INSTITUCIJAMA NA KANARSKIM OTOCIMA

U julu mjesecu, Univerzitet "Džemal Bijedić" u Mostaru bio je domaćin Ljetne škole "Mojoj BiH – Open your mind", koja već tradicionalno okuplja mlade iz različitih zemalja i kultura. Ove godine, u Mostar su stigli srednjoškolci iz čak sedam zemalja – Bosne i Hercegovine, Turske, Crne Gore, Makedonije, Hrvatske, Srbije i Švicarske.

Prorektorica za nauku i naučno-istraživački rad doc. dr. Amela Piračić je svim prisutnim poželjela dobrodošlicu i uputila srdačne pozdrave u ime rektorice Univerziteta prof. dr. Alena Huseinbegović i u svoje lično ime, te ih upoznala sa osnovnim informacijama o Univerzitetu "Džemal Bijedić" u Mostaru, fakultetima, univerzitetskim studijima i bogatoj ponudi studijskih programa koji se izučavaju na Univerzitetu, a koji su prilagođeni potrebama tržišta rada, kao i izrazila želju da se buduća saradnja nastavi i kroz obrazovanje na I, II ili III ciklusu studija.

Doc. dr. Maid Pajević održao je interaktivnu radionicu na temu "Uloga liderstva u savremenom sigurnosnom okruženju", otvarajući pitanja o tome šta danas znači biti lider i koliko su odgovornost i sigurnost povezani. Učesnici su aktivno diskutovali, iznosili svoja mišljenja i postavljali zanimljiva pitanja.

Mr. Sanela Kuko vodila je radionicu "Javni nastup sa fokusom na tremu" u okviru kojeg se govorilo o verbalnoj i neverbalnoj komunikaciji, javnim nastupima i prezentacijama, ali i o načinima kako savladati tremu pri javnom nastupu.

Program je završen šetnjom i upoznavanjem s kampusom Univerziteta "Džemal Bijedić" u Mostaru, pri čemu su učesnici ljetne škole bliže upoznali obrazovne i infrastrukturne kapacitete i resurse Univerziteta, te se bolje upoznali sa mogućnostima i beneficijama studiranja i studentskog života na Univerzitetu "Džemal Bijedić" u Mostaru.

PROMOCIJA STUDIJE „NEGIRANJE GENOCIDA U KOMPARATIVNOM PRAVU I SUDSKOJ PRAKSI”

By IROUNMO

Na Pravnom fakultetu Univerziteta „Džemal Bijedić“ u Mostaru 17. oktobra 2025. godine održana je promocija studije „Negiranje genocida u komparativnom pravu i sudskoj praksi“, koja je privukla pažnju studenata, nastavnog osoblja i šire javnosti.

Dekanica Pravnog fakulteta, prof. dr. Amra Jašarbegović, otvorila je događaj i istakla značaj predstavljanja naučnih studija koje se bave osjetljivim, ali izuzetno važnim temama za bosanskohercegovačko društvo i akademsku zajednicu.

Kao promotori studije učestvovali su:

Murat Tahirović, predsjednik Udruženja žrtava i svjedoka genocida, koji je predstavio rad i misiju udruženja te naglasio važnost očuvanja istine i sjećanja;

doc. dr. Suan Islamović sa Pravnog fakulteta Univerziteta u Bihaću, koji je govorio o pravu na slobodu izražavanja u kontekstu negiranja genocida;

doc. dr. Sunčica Hajdarović, prodekanica Pravnog fakulteta Univerziteta „Džemal Bijedić“ u Mostaru, koja je prisutne upoznala sa krivičnopravnim aspektima negiranja genocida i potrebom procesuiranja onih koji osporavaju presudama utvrđene činjenice o izvršenom genocidu u Bosni i Hercegovini.

Promocija je otvorila prostor za konstruktivnu raspravu o ulozi pravne struke u očuvanju istine, pravde i kulture sjećanja. Ovaj događaj još jednom je potvrdio da Univerzitet „Džemal Bijedić“ u Mostaru ostaje mjesto dijaloga, znanja i društvene odgovornosti.



AKCIJA DARIVANJA KRVI

By IROUNMO

U ponedjeljak, 20. oktobra 2025. godine, na Nastavničkom fakultetu Univerziteta „Džemal Bijedić“ u Mostaru održana je akcija darivanja krvi u saradnji s Džematom Zalik. Događaj je protekao u izuzetno pozitivnoj i motivišućoj atmosferi, a veliki broj studenata se odazvao pozivu da darivanjem krvi doprinese spašavanju ljudskih života.

Iako mnogi zbog zdravstvenih razloga nisu mogli dati krv, njihova spremnost i želja da pomognu drugima pokazali su visoku svijest o solidarnosti i važnosti humanosti. Svaki pokušaj darivanja, bez obzira na ishod, čin je plemenitosti i društvene odgovornosti.

Akcija je još jednom podsjetila na važnost razvijanja svijesti o darivanju krvi kao jednom od najhumanijih činova kojim pojedinac može doprinijeti zajednici.





KLINIKA IZBJEGLIČKOG PRAVA: SPOJ ZNANJA, SARADNJE I HUMANOSTI

By IROUNMO

Na Pravnom fakultetu Univerziteta „Džemal Bijedić“ u Mostaru 21. oktobra svečano je otvorena i sa radom počela Klinika izbjegličkog prava, zajednički program studenata Pravnog fakulteta Univerziteta „Džemal Bijedić“ u Mostaru i Pravnog fakulteta Sveučilišta u Mostaru.

Tokom protekle sedmice, oko 40 studenata sa oba mostarska univerziteta uspješno je završilo program Klinike. Nakon položenih testova, studentima su uručeni certifikati, dok su oni sa najboljim rezultatima nagrađeni posebnim priznanjima. Studenti su kroz predavanja, radionice i terenske posjete stekli dragocjeno iskustvo i uvid u rad institucija i organizacija koje se bave zaštitom izbjeglica i azilanata.

Posebno inspirativan trenutak bio je obilazak Prihvatnog centra za izbjeglice u Salakovcu, gdje su studenti imali priliku direktno razgovarati sa predstavnicima relevantnih institucija i civilnog sektora. Još jedno vrijedno iskustvo bila je posjeta slastičarnici koju je otvorila palestinska izbjeglička porodica – primjer uspješne integracije i održivog samozapošljavanja u lokalnoj zajednici. Klinika izbjegličkog prava nije samo edukativni program, već i primjer kako saradnja akademske zajednice, međunarodnih organizacija i državnih institucija može doprinijeti razvoju humanijih i efikasnijih pristupa zaštiti izbjeglica.

Klinika je rezultat saradnje između UNHCR-a, Ministarstva za ljudska prava i izbjeglice BiH, Ministarstva sigurnosti BiH, Udruženja Vaša prava BiH, te četiri pravna fakulteta iz Mostara, Tuzle i Bihaća. Ova inicijativa ima za cilj da buduće pravnike u Bosni i Hercegovini osposobi teorijski i praktično u oblasti međunarodnog izbjegličkog prava i Zakona o azilu u BiH.



DAN PUN ADRENALINA I TIMSKOG DUHA NA GORANCIMA

By IROUNMO

Studenti Odsjeka za sport na predmetu „Sportska rekreacija“ i Odsjeka za predškolski odgoj na predmetu „Aktivnosti u prirodi“ proveli su nezaboravan dan na Gorancima, ispunjen adrenalinom, smijehom i zdravim takmičarskim duhom.

U okviru terenske nastave, studenti su se okušali u paintballu, gdje su kroz timske igre i strategiju pokazali spretnost, snalažljivost i saradnju. Osim paintballa, dan je bio obogaćen raznim dodatnim igrama i zabavnim takmičenjima koje su dodatno ojačale timski duh i međusobno povjerenje među studentima.

Ova aktivnost pokazala je važnost boravka u prirodi, fizičke aktivnosti i rekreativnog druženja kao dijela studentskog života, ali i praktične nastave kroz koju studenti uče kako povezati teorijsko znanje s iskustvom na terenu.



UNIVERZITET „DŽEMAL BIJEDIĆ“ RAZVIJA SARADNJU S INSTITUCIJAMA NA KANARSKIM OTOCIMA

By IROUNMO

Profesori Ekonomskog fakulteta Univerziteta „Džemal Bijedić“ u Mostaru, prof. dr. Veldin Ovčina i prof. dr. Irma Dedić, boravili su protekle sedmice na Kanarskim otocima, gdje su s kolegama iz CIFP Felo Monzon Grau Bassas iz Las Palmasa razgovarali o unapređenju saradnje u oblasti stručnog obrazovanja i obuke (VET) te razvoju zajedničkih evropskih projekata.

Ovaj susret označava novu fazu međunarodnog povezivanja između Mostara i Kanarskih otoka, s fokusom na razvoj EU inicijativa u obrazovanju, mobilnosti i modernizaciji nastavnih procesa.

CIFP Felo Monzon Grau Bassas prepoznat je kao jedna od vodećih institucija na Kanarskim otocima u području strukovnog obrazovanja, te kao pouzdan partner u realizaciji projekata finansiranih iz programa Erasmus+ Capacity Building, Kreativna Evropa i Digitalna Evropa. Kroz ovu saradnju, studenti Ekonomskog fakulteta Univerziteta „Džemal Bijedić“ dobit će priliku za međunarodne prakse, dodatne obuke i razvoj kompetencija koje su ključne za uspjeh na savremenom tržištu rada. Istovremeno, nastavno osoblje imat će mogućnost učešća u istraživačkim i edukativnim aktivnostima, kao i razmjeni iskustava s evropskim kolegama, čime se dodatno jača kvalitet nastave i međunarodni ugled Univerziteta.

Ovaj posjet još jednom potvrđuje posvećenost Univerziteta „Džemal Bijedić“ u Mostaru razvoju međunarodne saradnje i unapređenju obrazovnih standarda kroz evropske projekte i partnerstva.



IROMAG



/iro.unmo



@iro.unmo



/iro.unmo

IROMAG TEAM
MIRSADA BEHRAM
LEJLA ŠKALJIĆ
AMILA VRTIĆ

